

澤州府志

星野方輿

第一冊

澤州府志序

寰宇有統志直省有通志郡有郡志邑有邑志夏官職方氏掌天下之圖以掌天下之地以周知天下凡邦國王設其牧制其職各以其所能制其貢各以其所有春官小史掌邦國之志以貳太史佐太宰注曰志者山川風土物產之書是郡邑之有志亦周官小史之所掌未可闕而不備我

皇上治周域外化洽宅中暨漸被於奧區殫神明於遐壤爰詔天下制撫臣修直省通志以釐職方廣史乘爲萬世章程甚盛典也雍正十二年三月 巡撫覺羅石大中丞修山西通志成先是雍正六年奉

旨澤州改州爲府州治設附郭邑曰鳳臺以壹統馭而專職

澤州府志

序

守樟於十二年春以工部屯田司員外郎

命來澤知府事澤旣改府凡官秩典制禮度執事允宜維新以昭法守且省志已告成功則郡志一書自應速行纂修以仰副

盛治在前守劉觀察毓岳許侍御日熾皆續而未竣樟至蒞事未敢稽延謹考輯前聞采述掌故遵省志以爲成憲合州志以爲舊章奠邦分命增式廓之規模按籍陳圖肅在輿之典守不敢謂一方之僻可以畧而弗詳不敢以衆說之多可以擇而弗慎敬謹詮次勒雕成編匪曰括地之是周亦惟用佐拾遺之一得云爾雍正十三年乙卯八月中秋後一日中憲大夫知澤州府事錢唐鹿田朱樟書

澤州府志

前明纂志李觀察維禎曰舊者續無者勑二三賢者以當官重務取徵文獻苦心未可泯也茲州志猶及見舊籍謹詳各脩續叅較姓氏并原始序文俾後來不念所白云

前纂脩姓氏

原脩明澤州知州顧顯仁江南武進進士

重脩澤州知州傅淑訓湖廣孝感進士

續脩澤州知州鄭際明河南商邱舉人

編次州人閻期壽孟履信校正學正李正養訓導扈從

卿李芬路尚賢彙輯州人崔效體程接孟張光先毛俊

民陳治統程式孟趙英督脩同知司政判官徐憲章吏

澤州府志

舊序

目郭大業

國朝續脩澤州知州陶自悅江南武進進士

叅考州同知宋鴻奉天金州進士訂閱高平知縣梅建

貴州普定舉人陽城知縣線梗正白旗監生陵川知縣

平鄆鼎浙江山陰副榜沁水知縣王用義四川渠縣舉

人分輯沁水庠生孫如琮沁水貢生季恒高平庠生姬

鼎燕陽城庠生白楔陽城進士白畿州貢生趙師城較

編學正閻開泰舉人訓導薛瑋貢生高平教諭王炳曰

朔州舉人督刊澤州吏目谷蓋忠容城吏員寫圖山人

王之掄

澤州府志

纂志舊序文

明萬曆山西按察使

李維楨

京山人

余自河西移晉陽未越月奉臺檄脩晉志因下諸有司各爲其府州縣志舊者續無者創以次第上備采輯諸有司苦簿書期會刑名錢穀日不暇給或視爲迂濶事不復省記或有增益改作令胥史檢舊牘錄以塞白而已事不贍核文不雅馴安所取裁今再逾歲譬之書空獨二三賢者以文獻取徵當官重務孜孜討論脩飾義例筆削故實華藻居然良史澤州其最著者也州守傅君楚人以余鄉先進有一日之長使使請正余爲輟櫛吐哺卒業則知君之所以爲志乃其所以爲政者耳古者天子聽政使公卿至於列士獻詩瞽獻典史獻書師箴瞍賦矇誦百工諫度人傳語近臣盡規親戚補察

澤州府志

舊序

二

瞽史教誨耆艾脩之而後斟酌焉猶未也歲時歌皇華遣使臣馳驅四牡諏謀度詢駢駢然每懷靡及歸而入告五年省方覲諸侯就問百年太師陳詩市官納賈考時月定日同禮樂制度法律衣服下至量衡必謹察之變革者以輕重誅討是故政行而不悖薄海之內顛若畫一今之爲政者簿書期會刑名錢穀寄聽胥史之口第能檢舊牘不甚乖盭如前所云是亦爲政矣孰有與衆同欲好謀能聽推見至隱舉事繩墨之外乎朝甚除田甚蕪倉甚虛無惑乎政之陵遲也傅君爲澤州一以寧民爲本除苛慝興廢墜張相怠惰在事二年凡所得自爲政者規畫不遺餘力而其所不得自爲政以俟同心共濟之賢抑所得自爲政必需假歲月者萃而志之於書夫世祿之家鮮克由禮細民效尤奢靡嬉遊一筋萬錢一

擲千金諂者崇社廟以相高悍者衽金革而不厭庠序之士連袂公庭左袒橫議自矜爲氣節而方命圯族滋甚抑有事生而割股事死而廬墓違中行者謂夫徇財不若徇名而姑爲之名使之慕然後約歸於中佛老之宮非椽形勝設綱會祝釐效靈者不載而慨夫吾徒之崇奉其師乃遜二氏正經興民以道成化不可戶說以眇論此君之所得自爲政而必需假歲月者也澤故有二郡王以無適嗣爵除其支度千數擇宗人署其事權輕令格不肖者往往魚肉細民身離文網有司莫如之何州介萬山中枉得澤名田故無多雖豐年人日食不足二鬴高貲賈人冶鑄鹽筴曾不名尺寸田田始八千四百頃履畝法行曾益殆萬汙邪蟹螺何所不籍稅稅難辦貧富於是以下出租庸丁一徵至三金經數十年不稽登

澤州府志

舊序

三

耗之數以衰序之貧民踣斃不振則有蠲追山五福荒土而裁冗役充逋賦之議中涓四出筭商告緡千餘金而贏采金伐山以來林木童禿卽鉛鐵硫黃耗損不及十七而動以乏軍興按額徵求不少衰止陽城之礦高平之紬轉輸費彌滋甚郵供不以時給糞人子旣難使里豪善規避不耐必委之市猾稱貸從役公家所出先以償子錢家馬與卒枵腹不支監燎致餐無人行旅道枳寧山武弁不討軍實演武之場鞠爲茂草猝有潢池弄兵胡以應之抱關擊析之吏譏征並虐付大盜不問此君之所不得盡自爲政而以俟夫同心共濟者也棲五尺之榻而慮周乎一州四邑之境受一日之直而謀及乎百千餘年之遠縉紳學士與夫深山窮谷之旄倪無不咨問昌言宏論街談巷議無不茹納朝考職畫講政夕序

業而夜庀事以就此志也自非然者何以擇而精語而詳丁寧反覆而穆然有深思如是故曰君之所以爲志乃其所以爲政者也反古之道巡守述職爲民爲事如指諸掌貽後之人布在方策人存政舉易於蒲蘆是志之謂矣夫已氏政之不知志於何有余因是竊有末議焉今天下州或隸府或直隸司直隸司者縣視州若府州視府若僚人情漸於勢利縣隸州者曰隸府者州縣一體也吾何盡以屬禮事若府曰若與隸我者州一也何不盡以屬禮事我詘體則太卑執體則太亢處於不詘不亢之間而猜嫌謗讟叢興中有宗藩尤號難治晉州直隸者五潞汾陞爲府矣澤亦宜然其說未易枚數君奚直不得自爲政且不得形諸詞色余不敏聊引其端於此云大秘山人李維楨本寧父撰

澤州府志

舊序

四

原序

明萬曆澤州知州 傅淑訓 孝感進士

往聞愚公之移太行也意爲直一部婁耳及攬轡來陟太行之巔遐哉齊青未了也蓋尼父於斯旋軫焉史稱尼父臨河而嘆某之不濟命也夫此非太行迴轅之言也酈道元水經注云邗水逕孔子廟東魏太和中孔靈度復碑也尋劉明駕再爲記直以爲從此返轍矣然不可詳轍迹巉然石間也余爲低迴留之不忍去云昔歌劉歆遂初賦馳太行之險峻入天井之高關及魏武苦寒行今殆身履之始知戰國時秦欲有事山以東諸侯畏韓之議其後也蓋此地可當百二也晉朱序竟破慕容永於茲豈不信哉郡有韓王山卽秦所爲圍韓王處也殆襲近攻之故智耳抵郡覩山川風物之勝南瞰三山縹緲落天外也誰言塞山童赤而堆阜乎第不著碑板

不足伯仲他勝耳獨可令山靈寂寞耶尙書紀禹貢析城至於王屋兩山在郡之西顧今丹水從萬山崱施中出也此故亦禹乘四載地也丹水蓋有二一出上洛冢嶺合於洵逕郡中東南者則劉越石琨扶風歌所謂丹水者也道元謂逕二石歷西巖巖下大泉湧發洪源巨輪淵深不測蘋藻冬芹竟川含綠此必爲珏石間者余讀山海經謁戾之山沁水出焉其東有林名曰丹林丹林之水出焉經旣屬西山乃曰沁水東爲郡之丹也無疑余因此亦足證山海之非誕書也山崱崵以差峩水渫泮以揚波間必有應山水之靈者矣乃澤故所爲戴明道二天者也方明道治郡時如一老塾師手自爲句讀習里中兒也豈嘗有奇政哉旣無一切鉤鉅乃預知盜牛者令自首此曷故焉然亦足想政簡而民朴魯矣今戶口

澤州府志

舊序

五

登耗之數旡當時何若財賦半以供縣官餘僅補苴祿入也更椎埋武斷有司者從事視向時何如哉余入郡陟太行之峻攀帷四境覩其謠俗又觀其所爲文獻穆然有深思焉先是郡劉羲叟以學術著聞廬陵公薦爲著作郎脩十三代史豈非郡故文獻耶今距先乘幾年於茲矣風土漸移人士輩出獨無如羲叟脩十三代史一脩郡乘哉然非徒爲故事乘體備而義例嚴鐵冶之微山澤畜擾風俗奢儉之故形勢險塞人才得失一草一木無不悉也鐵冶則禹貢之篠簜籛箝也山澤畜擾則周禮之職方所載也風俗奢儉則班掾之地里也形勢險要則昭代之方輿所記也人才得失則春秋之筆也草木鳥獸無不悉則益部之方物景純之圖讚也吁經濟者恒於斯遊覽者恒於斯守土者恒於斯聚國族者又且

生於斯長於斯將無當於封疆壺櫬之計陳詩納價稗官小史乎哉今誌將就木矣以余入郡初所舒眺而積想者序於簡端若此

又序

明澤州人 周盤 甘肅巡撫

郡舊無志有之自毘陵顧侯始顧去垂四十年所而壽昌傅侯至侯治濮濮理遂以才調澤未幾渡衛入懷陟天井崇關履回車故跡低回四顧則析城王屋揖拱後先沁水丹川映帶左右於是喟然歎曰美哉山河之固記稱兩淮咽喉三晉門戶詎不信哉既覽志乃進諸博士弟子曰志尚矣第今昔殊時沿革異軌一方文獻惡可闕焉不備邪乃開局徵儒攤書授槧旁摻野乘博采鴻猷凡五閱月而志成侯馳書屬不佞爲序不佞方治軍張掖戎馬劬勩何能爲侯贊一辭哉無

澤州府志

舊序

六

已乃就侯所裁定者一鋪揚之繫惟太行磅礴龍從衣帶河濟肘腋恒嵩茫茫輿曜實沈之東民淳地瘠唐虞遺風志方輿第一粵稽軒后畫野分疆爰開冀域亘於河陽郡邑繡錯靡匪金湯環環右臂擁護帝邦志沿革第二原伯肇封叔虞啟晉懿哉繆侯雅稱漢雋曰宣曰隰天潢衍孕勿僭勿驕昭哉祖訓志封建第三展采惟公作人有序境飭輿梁祠嚴鐘簷亭堠肇新庠帑積貯民力普存政先煦噢志建置第四惟守若令最爲親民賢哉司隸卓爾長孫視民如傷程氏聿遵官師濟濟永垂令聞志官秩第五光岳氣鍾人文藹藹如蘭上卿如郗太宰郝氏文忠衛氏元凱代有喆人希蹤千載志選舉第六則壤成賦計口徵徭土田礲薄物力且凋菑畚靡給而競錐刀寬徭簡賦釋此曉曉志籍賦第七明道爲政手

書課兒敦行教化於今頌之陳書置射潔俎豐粢思皇多士
振藻明時志學校第八屹屹封疆桓桓武衛唐之步兵爲諸
道最整我戈矛嚴我旌旆起起干城攘外安內志兵防第九
尼父垂憲報典攸崇壇壝分設燔燎斯煇祀張以節祀裴以
忠勿諂勿褻適儉適豐志祀典第十疇匪人材張公烈烈砥
柱狂瀾九死不折豈無華膺隼詎無節豪傑挺生安所羈縶
志叢舉第十一煌煌綸綍逮於先人綿綿簪組延於後昆隆
承帝渥報塞宜慰箕裘弓冶而子若孫志恩賚第十二循良
在牘四境歌棠高賢在寓百代流芳孰爲麟鳳山川之祥孰
爲聖瑜邦家之光志宦蹟第十三英乂篤生後先彪炳孝義
錚錚忠良耿耿野有遺賢高風可景室有貞媛秋霜益挺志
人物第十四天有災祥徵諸人事桑不爲妖雉不爲異間值

澤州府志

舊序

七

凶荒時遭兵燹脩德弭災挽回盛治志叢異第十五懸壺示
秘擲筆凌空崢嶸梵刹丹堊琳宮蕭梁漢武備極尊崇人天
小果虛幻浮踪志方外第十六劉公羲叟長於星曆王氏叔
和長於方脈著史立言撰經爲式一技之精聲光古昔志技
術第十七經天緯地命之曰文詞壇監幟藝苑抽芬光昭東
壁輝映西崑琳琅珠玉華國之珍志藝文第十八夫志昉於
史獲麟而後子長崛起於西京孟堅氏評之足爲百世定論
志所以垂考鏡示章程不準諸史何所籍以彰往詔來邪傳
侯博綜古今探討圖經出其經濟緒餘以究心於研削芟蕪
潤藻啟例發凡勒成一代之典以垂不朽嗣是臨蒞於斯遊
覽於斯及生長於斯者省風土握化導之機觀生聚勤拊摩
之實覩賢才興仰止之思攷著作動私淑之想乃知侯之思

深智遠而其功又當與河山並隆隆也

重脩序文

國朝大學士 陳廷敬 鳳臺人

九州之域有天產焉有人事焉天產則山川溪谷土地戶口是已人事則營造經畫賦歛選舉是已無天產則不稱奧區無人事則不成名都天產具人事備而紀述不詳則所謂山之巖壑而差峩水之浩汗而揚波人之磊落而英多者亦無以得其形容事迹顯於時而傳於後也周禮職方氏備記九州之山鎮川浸而禹貢并及於田賦貢筐此非郡邑志之所權輿歟嗣後有志一州一郡者如華陽之士女襄陽之耆舊則由於博雅君子欲表著其鄉之風義而然若夫賢守宰臨蒞其土而博攷圖經延咨故老不憚心手勤瘁以撰成一書者更有深意焉夫巖谷重阻則伏莽易生閭閻殷盛則風謠

澤州府志

舊序

八

必雜睹生齒之日繁則思何以富教稽征徭之煩重則思何以休息土雖膏腴而未耜弗操猶石田也士誠俊乂而絃誦數輟猶莠民也至於選舉盛典也開於前者可無繼於後孝義美行也興於下者可無作於上是必羅諸圖籍觸目警心始能先事而爲之所也然非賢且勤者亦孰肯從事於此歟我州居太行之巔地多磽瘠而丹水經其左沁河縈其右析城王屋名載夏書哲匠宗工後先輩出固晉豫間一都會也其可無所紀述乎州故有志至明萬曆三十五年而止迄今廢缺者久矣世歷百年事更勝國其間陵谷變遷閱興替盛衰廢興與世運相乘除則其關係之重且鉅者尤不可任其昧昧焉以至泯滅也毘陵陶侯以名進士來牧是州操廉而才敏教漸化洽百廢具舉而志獨缺如慨然曰是余之在

也因別門析類奮筆哀集自州至縣總爲若干卷書成請序於予予澤之鄉人也微侯請固將有述以傳爲稱引天產歸極人事之說以復於侯而况藉手於侯之著作歟抑予有感焉自有此州以來山川之閱人如郵舍蘧廬焉其能卓然自見於後代者藺相如明道先生郝文忠干忠肅三四人耳而明道尤以道自任禰濂溪而祖洙泗發於文章播於政績者純粹而篤實則誠百世之師也予固不敢不以之自勉而更冀生是鄉官是邦者咸有所樹立以期不朽庶無負陶侯纂錄之意也夫

重脩原序文

國朝澤州知州

陶自悅

毘陵人

域中三大權史居其一職獨領諸天子其起於封建變爲郡縣乎晉之乘楚之檣杙皆列國史也逮列國廢小史外史失

澤州府志

舊序

九

其官郡縣始專以志名實史之權輿志不信而求信於史憂乎難之又不徒備史料而已昭往示來用垂法戒民聽不惑乃知勸懲其必爲善也如水之寒火之熱其必不爲惡也如騶虞之不殺竊脂之不穀匪獨性生風教使然耳叔季職志失也久矣宜書不書則不宜書而書夫圖經者辨名者也功等紀載故承譌者失仰觀天文以明占驗故襲繆者失古今建立異名必核故漏且舛焉失之唇齒咽喉度其要險夷瀦洩審其用故夸者失而昧者亦失興作以時故侈張土木者失俎豆學宮有其舉焉而不錄廟食載非其鬼胥失也田賦異等墳墟異壤民數盈縮兵防興廢一切不稽其失也畧官師墨敗安然臚列而賢良姓氏若存若亡人材者一鄉之元氣也多掩於穢史之手乞米同恨其失也誣又安論竊曾

閔冑紀共但誇充隱終南孰數遼東避地馬醫魔外標榜滿
紙其失也離經而亂正風俗貞淫人事根本禮教衰而民行
薄不爲之爬垢索瘢其失也流蕩而難返寓言幻跡盡指眞
詮達宦貴人方爲噓墓瞻狗之失也有德則祥降無德則妖
興故棄人道而賢鬼及縷稱荒邈不經好奇之失也覘風經
國莫如詩與文名卿碩士有作不採則已採則必關風土外
此而漁獵空言溺心食耳其失也泛濫而無功悉反是道焉
以爲之則得矣雖然作者之難唐宋先之明一統志成於李
文達賢歸熙甫尙譏其後更有議姑蘇志命名之非者其他
可見元揭傒斯云脩史在得人有學問文章不知史事不可
與有學問文章知史事而心術未講不可與志猶史也今欲
舉澤之文獻振湮探蹟以續前緒故老無在杞宋何徵不尤
有難焉者乎先是

澤州府志

舊序

十

廟堂允輔臣請詔脩天下通志檄三晉郡縣各以書上當時
止憑舊志十八卷漫漶已不可辨蓋去脩志日且百數十年
而天崇後絕無聞焉踵事之增以同築舍間有留心考索不
無別錄世本而束之度閣殘文半蝕昔司馬文正通鑑成惟
王益柔讀一過耳然後知作者難而心知其意者尤不可易
也有司缺失將貽人心世道之憂此獨非程純公過化地乎
顧聽法戒茫然勸懲不立江河日下曷砥狂瀾不揣孤陋執
簡任之樸學小才以方曩哲奚翅上下牀之判而準道以爲
言刪存挾摘差具發明越一載餘輯成三十篇詎謂擇精語
詳可擬中衢之罇供瓦甌禪杓之隨浥滿腹而訓方勵俗不
援曲筆以滋心術累者有微尙焉其爲有識譏評與否所不

可知他日徵求或取諸此外高父唐荆川先生序澄江志慨然言家籍志籍體裁亦殊的然當實用而非取辦具文則一也因及前人以其用心而著之籍記後人因籍記而得前人所用心而守之某三載備官追維緒論雅思風教卒未克有所爲而以引年去心不易盡如是會書鐫訖工輒推原志之所以重并歷著脩之之失而且難不獲已續脩之意弁其端後有君子其用心當十百倍某使緣此知心不易盡姑卽書以見其用心所在則厚幸矣若取義徵事之爲得爲失終不敢據一隅自信以信後世而知罪不復計焉謹序康熙四十年五月歲次丙戌孟夏毘陵陶自悅譔

續志序

山西巡察刑科王 玘 太倉
掌印給事中

余奉

命巡察三晉所歷郡縣郊迎館謁莫不以志乘進跡其山川
土田建置沿革雖民物風尚時異勢殊而文獻可徵典型
在望類可以驗人事之盛衰政治之得失使者輶軒所指
觀風問俗不難援古證今因之得借鑒焉歲之嘉平按郡
至澤澤守許侯持舊志并續編一帙來問序蓋以澤初改
郡設縣規制不同而舊志已越三十年理宜續方今恭逢
聖天子在上振興吏治百度維新以直省郡縣生齒日繁撫
綏尤急恐沿循舊制或利不能興弊不能革非所以因勢
利導而化成民俗也於是視其地之衝繁難易添置郡守
或增設邑宰俾各脩其職毋致或廢澤故稱饒劇爲直隸
州轄有四邑今改爲府治增設附郭邑名曰鳳臺雖疆理
仍其舊貫而控制表率秩序井然規模倍爲洪廓誠盛事
也况

澤州府志

原序

十一

昭代右文近又

敕令直省督撫各脩省志檄取府州縣志以備采擇澤舊有
州志但已歷年所其間科甲蟬聯名公鉅卿勛銘竹帛及
忠孝廉節卓越人寰騷人逸士才藻濬發固有駸駸乎日
上者則續編又曷可緩乎哉夫志固未易言也非具有良
史才如舊志之簡覈嚴明高華樸茂亦何可遽議紛更而
輕事於脩輯况艾圃陶先生爲余鄉前輩文章經濟素爲
海內宗仰蒞澤數載教養兼施寬猛相濟循聲偉績卓然
在人耳目間迄今崇祀名宦澤人猶傳頌弗諼其所爲州

志具在也今侯亦以名進士來守是邦誠能以實心行實政力追蹤於既往復啟迪於將來自當有並美而齊休者而又何多讓歟至前志之所載不復損益惟增其近事而續成斯編韓子云莫爲之前雖美不彰莫爲之後雖盛弗傳余於許侯有厚望焉

續脩澤州府志序

太守 許日熾

澤州禹貢冀州之域分河東上黨之地以爲郡其治在全晉之南據太行之首表裏山河是爲要地其君子通經術重名節其野人勤稼穡務畜積所屬五縣布居谿谷之間四方舟車冠蓋之所不至爲易治地治雖易司牧者烏可不盡心以求治余於雍正九年秋以解梁牧攝守澤郡事思牧民之理必考之文獻因取郡志讀之以求其地形土田戶口財賦學

澤州府志

原序

十二

校兵防之政可因可革宜損宜益者舉而行之庶幾仰答聖主所以簡任之萬一以慰百姓仰望之心而其書則前守毘陵陶公之所脩也歲月未久又因脩通省志奉文取各屬志歸德劉公續入後事及陞州爲府改置附郭縣之詳固已燦然明備無可更訂矣顧以余自總角受書頗好涉獵公餘之暇猶事披覽每遇朔望宣講

聖諭廣訓必歷四境深山窮谷靡所不到行部所及勘事所至身自經歷或士大夫父老傳聞之說有可徵信者心焉識之所積頗多以爲是不可以不錄也夫澤志創於前代屢經名公筆削而陶公者博物君子以文章名於海內有著作之才其所爲書一辭曷贊劉公續近年之事徵集郡儒手定其文皆所聞見可謂實錄余以耳目所及豈能加之哉然廣谷

大川民生異俗因地而治治行而民安之苟有可以載於志者是皆有裨於治道者也涓埃之細山海不擇非以著述爲名欲以輯錄佐治耳余自諸生起家受任大郡幸逢

聖朝昇平之世時和年豐民淳事簡退食餘閒優游齋閣有事筆墨樂之忘倦在任之事所當續入其前事散見古書及金石遺文與采訪所得者亦補書焉新任將至當去草創已就故序其事弁其端以見余所以補續之意至郡邑所以必有志書與古之志所以記載取舍之義前人之序論之備矣茲不復云

曩者先大夫刺澤余時方在髫齡未及隨侍任所忽忽三十年來漂泊萍跡所謂析城王屋沁水丹川爲先大夫之所舊遊暨一二賢達相與賞奇而析疑者終無由造觀而請謁焉

澤州府志

原序

十四

歲癸丑巡察婁東甘泉王先生持節山右余從遊獲偕至澤澤之士民頌甘棠之蔭推屋烏之愛有知余至者擁擠呼號若皆以得見爲幸郡侯許公竒其事且爲之請曰比澤改爲郡增設鳳臺正議脩輯郡志今亦第從丙戌後所未載者採續成編子陶大夫文孫應爲我訂之余自顧非才不諳文義顧郡之賢士大夫業已摭拾成編命以卒業義無可辭因與先大夫門下士孔君興鈞等悉心叅攷呈之郡侯由後溯前歷三十餘年新舊相續彙成一書亦云盛矣按前此爲州志者自余鄉顧公始今郡侯纂脩府志乃以余爲先大夫之後叅較俾得厠名其澤志之與余鄉人偏若懸以相待余用以自愧又頗竊自喜也謹書數語於後并以誌志之不愆所自如此云毘陵陶宗正譔

續志分脩鳳臺縣解元孔興鈞貢生呂從誨歲貢申永
泰崔秉燹高平縣舉人牛道遠貢生李燿傳陽城縣生
員白楔成逢泰沁水縣進士樊初荀歲貢韓大惠



澤州府志

發凡

澤志自前明神廟中州守武進顯仁顧氏所纂是時奉文輯志李觀察維楨謂其能取徵文獻義例筆削居然良史不似他吏視爲迂濶不復省記或有增損不過令胥吏檢舊牘錄以塞白者大秘山人當代名賢而與其能不同俗吏存此舊簡俾後來得依據焉至康熙四十五年毘陵陶州守重修之昭然於記載間罔有闕失中間孝感傅君淑訓商邱鄭君際明相繼續修澤之志有完書矣今祇補輯舊有應增修者敬撰集編纂之惟是事不敢云多於前文亦未能減於舊凡例亦有義在謹論次如左方

一星辰分野作志者開卷第一義方也第窺天之學未易專

澤州府志

發凡

家前代稱李淳風獨擅其長晉書五行立法志推爲精審有史公所不及處而後人指駁亦不加恕今以澤論澤昔載分星四座而昴畢趙分之占直移而南絕不攷趙有上黨僅四載爲趙分在茲乎惟懸象在天推測在人占驗之術難以臆度四星同列以俟後之善言天者

一輿地沿革他州郡亦多有而未如澤之繁夥也今一州也而郡之縣之州之條郡而州條州而縣方數百里而變易廢置如舉棊不定前後五代鄭夾漈以爲分割不可詳姑無論卽一唐亦不易詳也故建置表後繼之以始末略懼不詳也而又志分置未已也邑地山川同者獨甚創考同一卷雖志例所無存之以資訂證如晉之郟鑿五朝之李賢田宏蔡襲及子祐宋之王友直諸人以其名地同也而

入之然此猶尊賢也至山川且從而援入如底柱者并禹
貢及尚書大傳而亦因之異辭甚不可也予自懼予之謬
戾不少也曷敢正前人之非然既見及之亦不敢泯焚物
產古蹟類難備具姑就所知者疏之於篇其他卷亦從同
一營建守土者所有事也前人已成之績不可忘學校以坊
民兵制以衛民廟祀以福民而叢祠社火有其舉之莫或
廢也亦如舊例

一貢賦澤之所出亦艱薄矣郡邑同載萬山中所謂千里片
石石之戴土無多幸而有尺寸土且耕且種依芑而爲生
而水忽汨之而旱忽乘之丹沁涓涓全輸山外而澤民不
與焉今獲生

重熙累洽之朝蒙湛恩汪濊之德屢加蠲卹獨厘稅緡故用

澤州府志

發凡

二

詳瘠土以厲民勞且類紀明農以毗民喜

一選舉人材之徑術邦國之棟隆澤之良由斯途進者不乏
漢唐宋以來求賢不一科有明則并於一途且上甲而少
乙豈知中奄干朝典維持紀綱者責不在斯矣猶幸科名
中尚有人在不附不阿以存大節今班班在籍也我

國家加意延攬徵辟科貢文武官材兼收並蓄號稱極盛故
凡在舉者咸登籍中

一秩官有事此土者也前代見於史傳有蹟可考者咸得序
其生平大凡以見其人之設施有明神廟時王朝雍題名
記謂咨詢耆老繙閱故牒其可知裁一百一人嗣是守此
土者悉可知矣其倅令師儒丞尉仍前志續載程純公云
賢者之政不幸而不傳其不肖者復幸而得傳若此者其

亦不少也今或有聞悉載入不知者闕以俟
一人物鍾太行之鬱盤涵丹沁之清駛應生峻潔魁特之人
以與地爭靈司徒土地之圖曰山林其民毛而方曰邱陵
其民專而長性情豈獨不與類在九州之產固各有異宜
而遷流之機亦與天同運有時散則千里百里有時聚則
東井五星澤故伊耆舊壤民有餘古而實自程純公服教
後學者如牛毛野處安得無才賢輩出壓太行而砥河流
者乎郝文忠經云耕夫販婦亦耻謠詠而道文理而午亭
陳氏亦云士皆却掃誦習不驚聲利有古隱君子風得宋
程明道遺教則是邦之人其節行之美應有自來矣披卷
生敬共豈徒謂千佛名經哉

一藝文澤之藝文也於澤有文則著之人澤而文非雖佳亦

澤州府志

發凡

三

弗及故於文有爲於是者悉登載籍縱或未抵於醇不妨
節取其是他如章疏國史應表其忠再若墓銘家乘原流
其美擷芳採華都歸本傳而已詩賦亦如之至本郡已事
不可無紀也雖荒邈亦存而不論兵事附其中按籍可攷
也襍志一卷博覽廣收以極事之變叢譚一卷傳疑傳信
以極事之通餘則凡志之所有亦無弗有焉耳矣

一史有褒誅志無毀譽說者謂志亦有懲惡之義而吾謂不
然郡邑之有志亦輿圖地理之是著上及星土下及山川
微及物類旁及怪迤而其中治民事神之跡量理學校之
規官府造作之繁迭運遷徙之變靡不於此見而後迺徵
文獻焉於春秋書名書字之例無與也故人物一志予而
不奪有可書之行則書之其是非邪正彼鄉隣自不揜也

若夫宦蹟一書誠有賢者不幸而不傳不肖者幸而得傳所不能自主也然賢奸大節亦易知志亦不能爲之隱一志之文亦不得與史同史及寰壤志及一方其文繁史及一代志及古今其文簡繁其所簡簡其所繁而志之體裁斯得如必瑟縮字句用史法則其文不章如必述引精詳用史體則其文不給武功志推爲邑志之美其書不過數萬言可法而不可仍也蓋地有喧寂人有衆寡事有疎密時有廢興不得執一論故此卷纂輯獨多而不芟俟後之君子取裁而論定焉

一古之耳目於上黨多矣澤於兩上黨畫其一而又正當中原之衡天下耳上黨天下目上黨也前攘後據不可省記而唐之中葉獨多其推放此澤潞節鎮之形勢其脣齒輔

澤州府志

發凡

四

車腹背臂指之屬不可不達也故具圖而載以說於潞固詳於澤又烏可畧哉太行山豈徒北紀之輿與是乃東南之鎮望也

一澤之四境於上黨爲關鍵官澤者又所當攷故復爲圖與說非四至八到府史之尺籍備簿牒按畫之所有雖有郡圖又別爲境圖執冊而臨四轍洞豁矣其所以悉著於說中

一丹沁二水爲此郡血脈疊嶺潦泉廻紆消息氣機之動節絡之轉與山潤其膚與地咸其窾而神明發焉因疏其來去逕貫以指其逝其爲說以水經經注爲經以考歷穿合爲緯

一澤志去後纂者不三四十載也故前守祗曰續迨予從事

何敢遽云修惟是展卷爬羅隨題疏義竟自成書直取證於前賢合美於省會遂爾矐目少異別具鑪錘殊不自諒其淺深矣

一高平畢亮四先生四州文獻一書從其族子正定司馬瀑借得叅伍頗多其稱引仍源其所自至許太守日熾田侍御嘉穀所補悉搜剔未有實費苦心不敢掠美謹列名於上方故凡經補出卽不攬入或有未詳則存彼節此

一志人物猶苦未悉梗槩以家刻志銘全不經見在華胄自以爲前志已備毋勞卮言在執簡則以爲軼事不傳尙翳霧豹

一列女舊載有未詳節略者特經開示陳補已據有牒到則增入餘無實跡仍存前名

一論傳詩賦前賢佳者甚繁如槩闌入恐於本書不合割愛不收諸墓志其可傳之跡悉采入本傳已足欽瞻如必長篇累紙官爵子孫之歷歷未免以一郡之書爲一家之乘至奏劄有關涉此間郡邑者自應備列不則卽所繫極大亦屬中朝文獻之華業在天下不在一鄉如盡行登載竊恐數尺書猶不足使挂一漏萬反生偏而不全之憾且盛德大業不敝天壤何必一隅矜爲獨得耶其亦有載者祇後漢陳將軍龜臨邊一疏以漢文絕少中亦見其才節故入之外此惟翟侍御學程抨擊魏奄一疏此古今所疾首痛心而能以死爭足爲此邦生色劉宮詹虞夔辭召一疏藹然見孝思郝文忠之罪言則斯土之橫罹困瘁因以見遭逢獨苦得身際太平之爲不易耳非是則不敢慁他若

於此土稍有披拂處縱片言隻字不敢遺逸也

伯淳程先生曰古者諸侯之國各有史故其善惡皆見乎後世自秦罷侯置守令則史亦從而廢今郡邑志亦史義也而非史裁史見善惡而志備衆體又非任史職可以舉一邦之秩官人材而進退之也以故修史與修志義同而體異春秋善善長而惡惡短惟於書法未敢有溢辭

是志之修升府後事前守劉觀察許侍御續而未定余自媿謏陋亦未易謂可卒業而此邦之賢達如田侍御已竭頻年之心力於此矣相見卽出舊所纂輯若干條眎我其搜羅頗極淵雅用是公暇於垂簾秉燭之餘復開陳簡載束初心一落紙墨便爾直據胸臆已忘成志之在前矣復檢原文合叅省乘覺新劔故劍錯出陸離其於補遺證誤於

澤州府志

發凡

六

是事不無勞動也適故鄉老友周君勤誥兆白夏君霽三子者至相與商確之而邑之孔君興鈞熟於此邦掌故得昕夕諮詢趙君文正亦咸有校讎之勤先是諸邑之耆舊未能悉萃於文館因屬令長敦延於本邑中應補應續者各以其責分任輯而復集乃觀厥成於高平有牛君道遠李君耀傳於陵川有劉君堯藩於沁水有樊君初荀侍御田先生則遐稽冥討不獨陽城是專也於其成例得並書以不泯其勞

是書之成始事於首春斷手於秋末一苦於少休暇不得如司馬公之以書局自隨宋學士之下帷修唐書不必以時日計再苦於載籍寡少博考未盡姑就所見聞麇摭而成其間多疎漏脫誤謬戾失遺之處尙望

賢士大夫教示之

澤州府志

發凡

七

澤州府志

纂修

澤州府知府錢唐

朱樟 己卯

協理

鳳臺縣知縣昆明

羅著藻 乙酉

高平縣知縣吳江

褚天緯 內閣供事 乙酉

陽城縣知縣江陵

王冕 乙酉

陵川縣知縣莆田

林學普 癸巳

沁水縣知縣候官

何陳宮 癸巳

分理

鳳臺縣學教諭署教授事太原

高掄 壬午

鳳臺縣學訓導太原

石樸 歲貢

澤州府志

纂修

高平縣學教諭曲沃

柴秉郁 甲午

高平縣學訓導大同

何朝珽 歲貢

陽城縣學教諭絳縣

李拔萃 丁酉

陽城縣學訓導谷

冉鼎臣 歲貢

陵川縣學訓導夏縣

楊書升 歲貢

沁水縣學教諭榆社

張雍 拔貢

沁水縣學訓導陽高

張瑾 歲貢

補輯

原任雲南道監察御史翰林院編修陽城田嘉穀 壬辰

分輯

蒲州府教授沁水

樊初荀 庚戌

高平縣舉人

牛道遠 癸卯

鳳臺縣武解元

孔興鈞 乙酉

陵川縣歲貢生

劉堯藩

高平縣監生

李耀傳

叅訂

原任福建漳州府同知陽城

張伊 癸酉

原任直隸正定府同知高平

畢濂 癸巳

原任江南和州知州鳳臺

衛樞

原任河南杞縣知縣鳳臺

陳賁懿 辛卯

原任廣東西寧縣知縣高平

崔文煌

鳳臺縣副榜候選主事

衛楷 己卯

鳳臺縣候選員外郎

王鏜

鳳臺縣舉人候選員外郎

王鏐 己酉

澤州府志

纂修

二

鳳臺縣貢生候選州同知

劉世振

鳳臺縣貢生

呂宸

鳳臺縣恩貢生

牛元善

鳳臺縣貢生候補光祿寺典簿

李承先

鳳臺縣貢生

陳廣嗣

鳳臺縣監生候選州同知

李助

鳳臺縣監生候選州同知

董繼舒

編次

鳳臺縣監生候選州同知

趙文正

鳳臺縣舉人

劉滋善 壬子

鳳臺縣舉人

陳傳始 壬子

鳳臺縣廩膳生員

閻大綬 乙卯 中式

鳳臺縣貢生

衛熾章

鳳臺縣貢生

衛德炘

高平縣附學生員

賈而善

鳳臺縣學附學生

衛秉銓

校對

鳳臺縣學增廣生員

孔毓灝

鳳臺縣學附學生員

王樞

鳳臺縣學附學生員

孔毓湜

鳳臺縣學附學生員

袁鉞

督刊

澤州府經歷仁和

鄭世祿

鳳臺縣橫望鎮巡檢韓城

李增生

澤州府志

纂修

三

鳳臺縣柳樹店巡檢富平

張琰

鳳臺縣典史休寧

吳賜令

鳳臺縣星軹驛驛丞錢唐

王顯宗

高平縣長平驛驛丞江寧

徐世琳

寫圖

太原山人

王延年

鄉約

秦玟

提調

崔景汶

澤州府志目錄

星野志 卷一

星野 星占 圖考 諸星占屬

總論

方輿志 卷二至十五

建置表 卷二

沿革始末畧 卷三

五縣分置 卷四 考同 附

疆域道里記 卷五 地表 附

山川 卷六

關隘 卷七

津梁 卷八

澤州府志

目錄

驛堠 卷九 墩臺 鋪遞 晉豫交界 附

形勝 卷十

風俗 卷十一 風土歲時記 附

物產 卷十二

古蹟攷 卷十三 原證 附

陵墓 卷十四

圖攷 卷十五 圖說 附

營建志 卷十六至二十一

城池 卷十六

學校 卷十七

公署 卷十八

兵制 卷十九 弁員 附

壇廟 卷二十

祠祀 卷二十一

寺觀 附

貢賦志 卷二十二至二十五

田賦 卷二十二

丁徭 屯田 稅課 鹽法 附

土貢 卷二十三

里甲 卷二十四

耕籍 老農 蠲免 賑卹
養老 囚糧 匠價 均攤 卷二十五

選舉志 卷二十六至三十二

封爵 卷二十六

薦辟 科目 卷二十七

官階 卷二十八

鄉貢 卷二十九

澤州府志

目錄

武科 卷三十 武勳 戚畹 附

誥錫 恩賚 任子 祭葬 卷三十一

鄉飲賓 卷三十二

秩官志 卷三十三至三十五

宦蹟 卷三十三

守牧 倅貳 卷三十四

縣令 師儒 縣尉 卷三十五

人物志 卷三十六至四十

節行 卷三十六

孝義 卷三十七

文苑 隱逸 卷三十八

列女 卷三十九

寓賢 技術 方外 卷四十

藝文志 卷四十一至五十二

御製 卷四十一

文告 卷四十二

經籍目 卷四十三

金石錄 卷四十四

文 卷四十五

襍著 卷四十六

賦 卷四十七

詩 卷四十八

紀事 卷四十九

祥異 卷五十

詩餘 附

兵燹 附

澤州府志

目錄

三

襍志 卷五十一

叢譚 卷五十二

澤州府志

星野志

星野


周禮春官保章氏掌天星以志日月星辰之變動以觀天下之遷辨其吉凶以星土辨九州之地所封封域皆有分星以觀妖祥謂以詔救政訪序事也澤在冀州一隅準晉分野考諸傳說應屬觜觿參之次至天官家言亦應占昂畢於前事殊有徵以故四宿並列以俟推詳而不載占驗鄭夾漈曰漢晉志不可以得天文者謂所載名數災祥叢襍難舉隋隱者丹元子步天歌句中有圖言下見象又不言休祥是深知天者茲紀其歌於歌前圖星形庶仰觀天象略具包羅云志星野第一

澤州府志

卷之一 星占

昂宿圖

唐志昂十一度



分野本占觜參居多考前志亦占昂畢則列圖應先昂畢次觜參以星序未可紊也

丹元子步天歌

七星一聚寔不少阿西月東各一星月下五黃天陰名
陰下六烏芻藁名營中十六天苑形河中六星名卷舌
舌中黑點天讒星礪石舌旁斜四丁

漢天文志昴畢冀州


晉志昴畢趙冀州

長平之戰太白食昴

宋兩朝天文志躔度云昴七星距西南星去極七十度
天阿一星去極六十六度入胃宿十度月一星去極七
十一度半入昴宿五度天陰五星距西星去極七十五
度半入胃宿七度天苑十六星距東北星去極一百七
度半入昴宿七度半芻藁六星距西行中星去極一百
八度入婁宿十一度卷舌六星去極五十三度入昴宿
初度天讒一星去極六十一度半入昴宿半度礪石四
星距南第二星去極六十五度入昴宿六度

畢宿圖

唐志畢十六度



澤州府志

卷之一

星占

三

丹元子步天歌

恰似瓜叉八星出附耳畢股一星光天街兩星畢背旁
 天節畢下八烏幢畢上橫列六諸王王下四阜天高星
 節下團圓九州城畢口斜對五車口車有三柱任縱橫
 車中五個天潢精潢畔咸池三黑星天關一星車脚邊
 參旗九個參車間旂下直間九旂連旂下十三烏天園
 九旂天園參脚邊

月令正義酉爲大梁初胃七度終於畢十一度

晉天文志自畢十二度至東井十五度爲實沈於辰在

申魏之分野屬益州注云晉魏冀并之域非今之西蜀益州

宋兩朝天文躔度云畢八星距右股第一星去極七十

五度天街二星距南星去極七十一度入昴宿十度附

耳一星去極七十七度入畢宿三度天節八星距北星
 去極八十度半入畢宿三度諸王六星距西星去極七
 十度入畢宿三度天高四星距東星去極七十四度半
 入畢宿六度五車五星三柱九星距大星去極四十七
 度半入畢宿七度半天潢五星距西北星去極五十八
 度入畢宿十一度咸池三星距南星去極五十一度入
 畢宿十一度半天關一星去極七十一度半入觜宿初
 度參旗九星距南第一星大星去極八十七度入畢六
 度九旂九星距南星去極一百一十三度入畢宿十二
 度天園十一星去極一百二十四度入畢宿五度

澤州府志


卷之一

星占

四

觜宿圖

唐志觜二度



丹元子步天歌

三星相近作觜彙觜上座旗直指天尊卑之位九相連
司怪曲立座旗邊四烏大近井鉞前

唐志上黨次居下流與趙魏接爲觜觶之分

李淳風法象志觜觶參伐皆直天關表而在河陰故實
沈下流得大梁距河稍遠涉陰亦深

晉志觜參魏益州


洛書甄耀度西方白虎而觜參爲虎首故有觜之義宋
兩朝天文志躔度云觜三星距西南星去極八十二度
半座旗九星距南星去極六十度半入參宿八度司怪
四星距南星去極七十一度入參宿六度半井八星距
西扇北第一星去極六十九度鉞一星去極六十九度

少入參宿八度半

按末二座星不補圖因井宿別占不具列以歌及之祇
載纏度

參宿圖

唐志參九度



澤州府志

卷之一

星占

六

丹元子步天歌

總是七星觜相侵兩肩雙足三爲心伐有三星足裏深
 玉井四星右足陰屏星兩扇井南襟軍井四星屏上吟
 左足下四天厠臨厠下一物天屎沉

漢天文志晉之疆候辰星占參伐

馬融上日食封事參居兌位屬西方其爲分野并州是也

法象志觜參實沈之次於辰在申於州爲益不曰冀并而曰益州

者春秋元命苞曰觜參流爲益州益之爲言隘也謂物類竝決其所在之地險阨也又曰益之爲言隘也

宋兩朝天文志躔度云參十星距中星西第一星去極九十二度半玉井四星距西北星去極九十八度少入

畢宿十一度半天屏二星距南星去極一百一十五度
入畢宿十三度半軍井四星距西南星去極一百五度
半入畢十四度天厠四星距西北星去極一百一十八
度半入參宿二度屎一星去極一百一十五度入參宿
三度半

按以上諸星屬昴畢觜參四星者考晉志隋史乾象新
書所載與步天歌互有不合臆爲歌以指諸星之附麗
其遠近高下或不必要盡同不嫌其不合也

諸星占屬

兩鎮三關志分野說有屬之五星者有主之七星者有配之支幹者有合之節氣者

斗柄屬樞星

春秋緯文耀鉤曰太行以東至碣石王屋底柱冀州于斗柄屬樞星漢天官書魁枕參首北斗七星太微垣北七政之樞機陰陽之本元也故運乎天中而臨制四方以建四時而均五行一曰天樞二曰璇三曰機四曰權五曰玉衡六曰開陽七曰搖光一至四爲魁五至七爲杓蓋帝張四維運之以斗月徙一辰復返其所故其主如此

五星屬辰

史記云晉之疆候在辰星占參罰漢天官書曰五星屬辰

澤州府志

卷之一 星占

八

漢志注曰辰星主冀幽并唐書曰晉亦候辰星占參罰鄭漁仲曰辰星北方冬水智也聽也張衡云五星之精體生于地精成于天列居錯峙各有攸屬晉灼曰辰常以二月春分見奎婁五月夏至見東井八月秋分見角亢冬至見牽牛出以辰戌入以丑未二旬而入晨候之東方夕候之西方一歲一周天

十二支屬申

皇甫謐曰趙分野自畢十二度至東井十五度曰實沈之次於辰在申謂之涿灘於律爲仲呂斗建在巳唐天文志數從星紀起實沈初畢十二度立夏中井初小滿終井十五度蔡邕云起畢六度至井十一度謂之實沈立夏小滿居之

十二次屬實沈

帝王世紀十二次屬實沈春秋左傳曰帝堯遷高辛氏季子實沈于大夏主參故參爲晉星實沈參神也晉語董因曰實沈之墟晉人是居實沈自畢十度中參終井十一度晉魏分野保章氏鄭注云實沈晉也趙晉冀州并州胃昴畢觜參

二十八宿屬觜參

寰宇通志云澤觜參井之分圖書編曰澤州觜參分野洛書甄耀度西方白虎觜參三星爲虎首參伐十星中三星虎身隅四星四足伐三星尾也爾雅星紀觜觿參魏分唐志參罰爲戎索爲武政當河東盡大夏之墟上黨次居下流與趙魏接爲觜觿參之分

總論

春秋左傳昭公元年子產曰后帝遷實沈于大夏主參註云后帝

堯也大夏今晉陽縣後成王滅唐而封太叔

晉公子重耳出奔歲在實沈秦伯納之故傳曰董因云君以辰出而以參入必獲諸候是參之於晉特專

史記天官書昴畢冀州觜觿參益州

李志觜實沈之次於辰在申於州為益註云晉魏冀并之域春秋元命苞云參伐

流為益州非今之西蜀益州也

漢地理志趙地昴畢之分野趙分晉得趙國西有太原定襄雲中五原上黨上黨本韓之別郡遠韓近趙後卒降趙皆趙分也

隋地理志冀州古堯都其於天文自胃七度至畢十一度為

澤州府志

卷之一 星占

十

大梁屬冀州帝居所在其界九大故姬訾之屬并州鶉火之屬河內河東皆在焉

唐一行曰觜觿參伐實沈之次初起畢十度餘八百四十一杪四之一中參七度終東井十一度據山河考之河東及上黨太原盡西河之地古晉魏虞唐耿楊霍冀黎郇西河之濱又河東平陸芮城河北縣及河曲豐勝夏州皆東井之分

圖書編山西諸郡汾州參平陽澤州觜參太原潞安遼州沁州參井三觜參四參井惟昴畢為大同

明一統志澤州禹貢冀州之域天文觜參分野

晉天文志十二次自胃七度至畢十一度為大梁於辰在西趙之分野屬冀州又州郡躔次昴畢趙冀州趙郡入畢

八度上黨入輿鬼二度東井輿鬼秦雍州洪氏容齋云
十二國分野上屬二十八宿其爲義多不然前輩固有
論矣其甚不可曉者莫如晉天文志分地列宿謬亂錯
雜而出自李淳風之手豈非蔽於天而不知地乎其說
如此

按李志前代獨推其精密謂天官一書成于專家爲歷
代史中所不及卽馬遷猶當遜長今洪氏非之參之輿
地原多不協或天步別有占驗存以俟核者然考州郡
躔次陳卓范蠡鬼谷張良諸葛亮譙周京房張衡並云
上黨入輿鬼是李淳風之說未必盡非而洪容齋之譏
恐未當此又一說也

自史記晉天文志金史以大梁之爲趙其占爲昴畢者無不

澤州府志

卷之一

星占

十一

同據山河考濁漳以北常山以東又北逾鴈代皆其野
表裏河山藩屏中國爲畢分又西盡塞垣皆髦頭故地
爲昴分且冀之北土馬牧蕃庶天苑之象亦存唐志參
伐爲戎索爲武政當河東盡大夏之墟上黨次居下流
與趙魏接爲觜觿之分

舊志參晉星也韓趙魏衛之界晉土也然亦大畧耳班固
配十二次自胃七度中昴至畢十一度爲大梁辰在西
趙之分野屬冀州自危十六度中室壁至奎四度爲媿
訾辰在亥衛之分野屬并州陳卓京房張衡並云昴畢
趙冀州營室東壁衛并州故太原候室壁上黨應候昴
畢唐一行以山河兩戒二十八宿度數配地絡之南北
陰陽昴畢間爲天街陰陰國陽陽國元命苞曰昴畢散

爲冀州立爲趙國上黨趙之分地秦趙遇于長平太白食昴未嘗食參古不以昴建上黨上黨屬晉也晉初不封上黨背參不臨上黨非昴其孰主之高平爲上黨地長平之遺跡昭然故高平當屬昴而畢在天街南陽國不占觜觶距參一度爲虎首畫野在王屋以東王屋陽城之屏虎有首有身不可以參先觜觶故陽城當屬觜觶此可以斟酌澤郡之星次分合矣

謹案星土注疏星土星所主土也九州封域於星亦有分其書已矣其存可言者十二分之次實沈晉也是已攷之上黨前後昔爲諸翟所居晉強肆伐始收入版圖故有晉初不封上黨背參不臨上黨之說夫分國有變遷而星象無改移若史記觜觶參屬益州爲冀之域唐

志則以上黨次居下流爲觜觶之分近是惟明一統志及圖書編竟以觜參分野專屬從晉志也漢志晉之疆占參伐是槩晉言而澤則差遠漢地里志獨占昴畢隋史金史亦然春秋元命苞亦以昴畢屬趙長平之役太白食昴占驗家又復主之是四星者體後先相附附星亦有兩屬者舊志同列茲釐証獨詳以資博覽焉

